

Ikalaata ilya kwanda ilya Yookhani Uwandilo

Umusundikwa uYookhani ásimbile ikalaata ili ku Bhakilisiti bhamu bhe ábhabhuziizye anza bhaana bhaakwe. Akubhalamba aBhakilisiti kujendeelela kwimiilila akhinza mu lwitikho kwa Mlungu mwa Yeesu Kilisiti. Khabhili akubhasokha kukhaana imanyizyo izya bhamanyizyi abhi lenga, bhe bháliipo mu shibhanza. Akubhakumbusya aBhakilisiti kuti uweene áamile nu Yeesu. Pe shiniisho, amanyile nalyoli kuti uYeesu áamile nu mubhili uwa muntu anziitwe, khabhili áamile Mwana wa Mlungu. Akubhasundiilila aBhakilisiti kuti, bhakhayibha nu wuumi uwa wiila na wiila, inga bhakujendeelela kumwitikha uYeesu. Akubhabhuzya kuti wiila aBhakilisiti bhakwanziwa bhamugane uMlungu na kuganana bhimbho.

Zye zili mu shitaabu ishi
UYeesu lye Lizwi lya wuumi
ABhakilisiti bhabhe mu lukhozyo, bhabhe bhantu bha Mlungu
ABhakilisiti bhaana bha Mlungu, bhagananaje
ABhakilisiti bhabhe amiiso na bhamanyizyi abhi lenga, bha
Kutola imbiibhi na kubha nu wuumi uwa wiila na wiila

Izwi ilya wuumi

¹ Tukuvwinsya izya wuula we Lizwi lya wu-
umi, we áliipo kufuma kuwandilo we insi yishiili
kupelwa.* Itwe twámwimvwizye na kumolola
na miiso giitu tuneetwe, tukhamwenyaaga na
kumupalamansya ni nyoobhe zyitu.

² Wunúyo uwa wuumi akhalolekha, itwe
tukhamolola. Ishi tukubhasimishizya na
kuvwinsya izya wunúyo we akuutupa uwuumi
wunúwo uwa wiila na wiila, we áamile kwa
Taata uMlungu, akhalolekha kukwitu.†

³ Tukuvwinsya izya Yeesu wunúyo, we
twámulolile na kumwimvwa, inga mubhe peeka
niitwe. Uwúpeeka we tuli nawo ku kubha peeka
nu Taata uMlungu, nu Mwana waakwe uYeesu
Kilisiti.‡

⁴ Tukubhasimbila ziniizi, inga tuseshele
nhaani.

Kwikhala mu lukhozyo

⁵ Izi zye ntumi zye twázyimvwizye kwa Yeesu,
zye tukubhabhúzya imwe, kuti uMlungu
lukhozyo, atali na khiisi naakhamu mukaasi
yaakwe.

⁶ Inga tukulonga kuti tuli nu wúpeeka
nu Mlungu, kumo tukujendelela kwikhala
mu khiisi, tukwanda lilenga, khabhili we
tutakubhomba uwanalyoli.

⁷ Heelo, inga tukwikhala mu lukhozyo,
anza she uMlungu akwikhala, pe tutibhe
nu wúpeeka tuneetwe na tuneetwe. Khabhili

* **1:1 1:1** Bhaazy Wandilo 1:1; Yookhani 1:1-3. † **1:2 1:2**
Bhaazy Yookhani 1:14. ‡ **1:3 1:3** *uMwana waakwe uYeesu*
Kilisiti Bhaazy **uMwana wa Mlungu** mu **Wilulanyo uwa**
mazwi amajeni.

ibhanda lya Mwana waakwe uYeesu likutuzelufwa imbiibhi zyiṭu zyonti.

⁸ Inga tukuti itwe te twe bhi mbiibhi, tukuyikhopela taneetwe, tutawumanyile uwanalyoli.

⁹ Heelo, inga twitikha kuti tubhombile imbiibhi, uMlungu atitutuyile na kutuzelufwa uwubhiibhi wonti, kunongwa ye uweene musunde, khabhili mugolosu.

¹⁰ Inga tukuti tutabhombile imbiibhi, tukumubhiikha uMlungu kuti wi lenga, khabhili tulikhaanile izwi lyakwe nziila.

2

UKilisiti we akutupuutila

¹ Bhaana bhaani, inkubhasimbila inongwa ziniizi, kuti matabhombaje imbiibhi. Heelo poope inga umuntu abhomba imbiibhi, tali na we akutulambila kwa Taata uMlungu, wunuyoyu wu Yeesu Kilisiti, we Mugolosu.

² UYeesu we mpamba iya kubhoolwa na kwi dala liniilyo ayefwizye imbiibhi zyiṭu na kutukhomaanya nu Mlungu. Khabhili te mbiibhi zyiṭu nyeene khaala, lyoli ni mbiibhi izya bhantu bhonti.

³ Inga tukuzitinikha indajizyo zya Mlungu, pe tatibhe nu lusimishizyo kuti tumumanyile.

⁴ Umuntu we akuti amumanyile uMlungu, ileelo atakuzitinikha indajizyo zyakwe, akwanda malenga, atawumanyile uwanalyoli.

⁵ Lyoli umuntu wowonti we akulitnikha izwi lyakwe, amuganile uMlungu nalyoli. Idala ilya

kumanya kuti tuli nu wupeeka nu Mulungu, lye li liili:

⁶ umuntu we akuti ali nu wupeeka nu Mulungu, akhondeeye kuti ayikhalaje anza she uYeesu akhikhalaga.

Indajizyo ya Yeesu iya kuganana

⁷ Bhaganwa bhaani, indajizyo ini ye inkubhasimbila te mpwa khaala, lyoli ndajizyo yiyi-ila iyi maandi ye mwamile nayo kufuma pe mwitishile. Indajizyo yiniyo iyi maandi, lizwi liila lye mwalyimvwizye.

⁸ Khabhili indajizyo ini ye inkubhasimbila, ye mpwa.* Uwanalyoli waakwe wakulolekha mu njendo zya Yeesu Kilisiti, na mu njendo zyinyu, kunongwa ye akhiisi khakwepa, nu lukhozyo ulwa nalyoli lukukhozya.

⁹ Umuntu we akulonga kuti akwikhala mu lukhozyo kumo akumuviitilwa unholo waakwe mu lwitikho, ali she akwikhala mu khiisi.

¹⁰ Umuntu we amuganile uwamwabho, akwikhala mu lukhozyo. Khatalipo naakhamu mukaasi yaakwe akha kumwazya kubhomba imbiibhi.

¹¹ Heelo umuntu we akumuviitilwa uwamwabho, ali mu khiisi. Akujenda mu khiisi, sita kumanya kwe akubhala, kunongwa ye akhiisi khamugubishiiye amiiso.

¹² Inkubhasimbila imwe mubhaana abhansi, kunongwa ye imbiibhi zyinyu zituyiliilwe nu Yeesu Kilisiti.

¹³ Inkubhasimbila imwe mabhataata,

* 2:8 2:8 Bhaazyu Yookhani 13:34.

kunongwa ye mumumanyile uYeesu Kilisiti,
we áliipo kufuma kwandilo.

Inkubhasimbila imwe mubhatunta,
kunongwa ye mumutolile
umubhomba mbiibhi uSeetani.

¹⁴ Inkubhasimbila imwe mubhaana,
kunongwa ye mumumanyile uTaata
uMulongu.

Inkubhasimbila imwe mubhataata,
kunongwa ye mumumanyile uYeesu Kilisiti,
we áliipo kufuma kwandilo.

Inkubhasimbila imwe mubhatunta,
kunongwa ye muli na makha,
mulilemile izwi lya Mulongu,
khabhili mumutolile umubhomba mbiibhi
uSeetani.

¹⁵ Ishi, mutayiganaje kubhomba anza bhantu
bhe bhatakumutinikha uMulongu, khabhili
mutaviganaje vwonti vwe bhakuvigana. Inga
umuntu akuwugana uwubhiibhi uwa mu nsi,
atamuganile uTaata uMulongu.

¹⁶ Uwubhiibhi uwa mu nsi we wu wuuwu:
insungukho imbiibhi izya mubhili, umwone
uwa kubha nakho khokhonti khe wakhalola, na
mabaado ge gakufumilana ni shuma. Vwonti
viniivwo vitakufuma kwa Taata uMulongu, lyoli
vikufuma mu nsi munuumu.

¹⁷ Insi peeka ni nsungukho zyakwe imbiibhi,
vikushila. Heelo umuntu we akubhomba zye
zikumukhondezya uMulongu, akubha nu wu-
umi wiila na wiila.

Kubha amiiso na bhalugu bha Kilisiti

18 Bhaana bhaani, insiku izya kumpeleela zifishile! Mwimvwizye kuti umulugu wa Kilisiti† akwinza, niishi abhalugu abhinji abha Kilisiti bhinzile. Shiniisho she tukumanya kuti tuli mu nsiku izya kumpeleela.

19 Abhantu bhanaabho bhafumile kukwitu, ileelo bhatamile nu wupeeka uwa nalyoli nitwe. Kwe kuti inga bhabhanje nu wupeeka uwa nalyoli nitwe, nhani bhasyalile kukwitu. Heelo bhakhasogola, inga yilolesye apazelu kuti bhatamile nu wupeeka nitwe.

20 Heelo imwe uMulungu abhapiiye uMupepu uMufinjile,‡ ishi mweni muwumanyile uwanalyoli.

21 Inkubhasimbila ikalaata ili, te kunongwa ye mutawumanyile uwanalyoli, lyoli kunongwa ye muwumanyile. Khabhili mumanyile kuti ilenga lyolyonti litakufuma mu wanalyoli.

22 Umuntu uwi lenga wu naanu? Umuntu uwi lenga wu wula we akukhaana kuti uYeesu wu Kilisiti.§ Umuntu anza wanuuyo, we mulugu wa Kilisiti, akumukhaana uTaata uMulungu nu Mwana.

† 2:18 2:18 *Umulugu wa Kilisiti* kwe kuti we akudindanjila imbombo ya Kilisiti. ‡ 2:20 2:20 *UMulungu abhapiiye uMupepu uMufinjile* Mu ndongo iya Shiyunaani yikuti *apashiilwe amafuta*. ABhaisilaeli we bhakumabhikha umuntu pa mbombo iya shipuutili ni ya wamwene, bhakhamupakhaga amafuta pi twe kulolesya kuti aposheleeye uMupepu uMufinjile. Bhaazya 1 Samweli 16:13; Yeesaya 61:1. § 2:22 2:22 *UKilisiti* kwe kuti ula we asebhilwe nu Mulungu kubhapokha abhantu na kubhatabhaala mu wamwene waakwe. Bhaazya **uKilisiti** mu **Wilulanyo uwa mazwi amajeni**.

23 Wowonti we akumukhaana uMwana, akumukhaana nu Taata uMulungu. Ileelo, wowonti we akumwitikha uMwana, we ali nu wupeeka nu Taata uMulungu.

24 Ishi, amazwi gaala ge mwimvwizye kufuma kwandilo, mujendeelele kugalema mu mooyo giinyu. Inga mukujendeelele kugalema amazwi ganaago mu mooyo giinyu, pe niimwe matijendeelele kubha nu wupeeka nu Mwana, nu Taata uMulungu.

25 Lye atulajile uMwana lye li liili, kubha nu wuume uwa wiila na wiila.

26 Inkubhasimbila ziniizi, ku zya bhantu bhaala bhe bhakwanza kubhatezya.

27 Ileelo imwe, uMulungu abhapiiye uMupepu uMufinjile, we akwikhala mukaasi yinyu. Wunuyo we akubhamanyizya zyonti, imanyizyo zyakwe zya nalyoli, te zya malenga. Pe shiniisho, yitakwanziwa kuti umuntu abhamanyizye.* Anza she uMupepu abhamanyizize, ishi mujendeelele kubha nu wupeeka nu Kilisiti.

Kwikhala anza bhaana bha Mulungu

28 Ishi bhaana bhaani, mujendeelele kubha nu wupeeka nu Kilisiti, inga mu khabhalilo khe akhayigalukha winza, tukhabhe nu wudandamazu, tutakhubhe ku nsoni pi siku ilya kwiza kwakwe.

29 Inga mumanyile kuti uKilisiti mugolosu, mumanye kuti wowonti we akubhomba izya wugolosu, we apapiilwe nu Mulungu.

* 2:27 2:27 Bhaazya Yookhani 14:26.

3

1 Yeenyi she uTaata uMlungu atuganile nhaani, poope bhakutubhilishila kuti twe bhaana bhaakwe! Nalyoli she tuli. Abhantu bhe bhatakumutinikha uMlungu bhatatumanyile, kunongwa ye bhatamumanyile uweene.

2 Bhaganwa bhaani, ishi itwe twe bhaana bha Mlungu, ileelo yitamanyishile apazelu she tukhayibha. Lyoli tumanyile kuti mu khabhalilo khe uKilisiti akhayigalukha winza, tukhayikholana nawo, kunongwa ye tukhayimulola she ali.

3 Wowonti we akusubhila shiniisho kuti akhayikholana nu Kilisiti, ayizelufwaje inga abhe mufinjile, anza she uKilisiti wuuyo mufinjile.

4 Wowonti we akubhomba imbiibhi, akunanganya indajizyo zya Mlungu, kwe kuti kubhomba imbiibhi, kwe kunanganya indajizyo.

5 Mumanyile kuti uKilisiti ayinzile kuzyefwa imbiibhi zyita. Khabhili uweene atakubhomba imbiibhi naazimo.

6 Ishi wowonti we akujendeelela kubha nu wupeeka nu Kilisiti, atakujendeelela kubhomba imbiibhi. Wope we akujendeelela kubhomba imbiibhi, atakuziyaganya kuti uKilisiti wu naanu, khabhili atamumanyile.

7 Ishi bhaana bhaani, mutakhiitithe kuti umuntu wowonti abhatezye. Umuntu we mugulosu pamiiso ga Mlungu, anza she uKilisiti mugulosu, wunuyo we akubhomba izya wugulosu.

⁸ Heelo umuntu we akubhomba imbiibhi, muntu wa Seetani, kunongwa ye uSeetani ajendeleeye kubhomba imbiibhi kufuma kuwandilo. Ye nongwa uMwana wa Mlungu ayinzile mu nsi, kuzinanganya imbombo zya Seetani.

⁹ Wowonti we apapiilwe nu Mlungu, atakujendeelela kubhomba imbiibhi, kunongwa ye ali ni zya Mlungu mukaasi yaakwe. Atangajendeelela kubhomba imbiibhi kunongwa ye uweene apapiilwe nu Mlungu.

¹⁰ Heelo umuntu we atakubhomba izya wugolosu, awe we atamuganile uwamwabho, wunuyo te mwana wa Mlungu. Shiniisho she takuwumanya uwuleganu uwa bhaana bha Mlungu, na bha Seetani.

Kuganana

¹¹ Intumi ye mwayimvwizye kufuma kuwandilo ye yi yiini: takhondeeye kuti tugananaje.

¹² Tutakhabhe anzu muntu ula we bhakhatinji uKaayini, we amile wa mubhomba mbiibhi uSeetani, akhamugoga umunsi waakwe.* Khooni khe amugojile? Amugojile kunongwa ye imbombo zya Kaayini zyamile mbiibhi, izya munsi waakwe zyamile ngolosu.

¹³ Ishi, bhanholo bhaani mu lwitikho, mutaswigaje inga abhantu bhe bhatakumutinkha uMlungu bhakubhaviitilwa.

¹⁴ Itwe tumanyile kuti twepile mu makha ga wufwe, na kwinjila mu wuume uwa wiila, kunongwa ye takubhagana abhanholo bhitu mu

* **3:12 3:12** Bhaazya Wandilo 4:1-8.

lwitikho. Umuntu we atali nu lugano asyalile mu wufwe.†

15 Wowonti we akumuviitilwa uwamwabho, mugoji. Mumanyile kuti ataliipo umugoji we ali nu wuumi uwa wiila mukaasi yaakwe.

16 Itwe tulumanyile ulugano, kunongwa ye uKilisiti afumwizye uwuumi waakwe kukwitu. Nitwe shiniisho, tukhondeeye kuti tufumwaje uwuumi wiitu ku bhanholo bhitu mu lwitikho.

17 Umuntu wowonti we mugoma wa vintu akumulola uwamwabho abhuliliilwe, ileelo atakubha nu mwoyo uwa shisa, angalonga bhuliibhuli kuti ali nu lugano lwa Mulungu?

18 Bhaana bhaani, tatalongaje lyi lomu lyene kuti tubhaganile abhamwitu, lyoli tubhaganaje nalyoli kwi dala ilya kubhabhombela inyinza.

19 Kubhagana abhamwitu shiniisho, tungabha nu lusimishizyo kuti tukulandata uwanalyoli, khabhili amooyo giitu gakutengaana pamiiso ga Mulungu.

20 She poope tukulongwa mu mooyo giitu tuli nu wutengaanu, tumanyile kuti uMulungu we mapiti kushila amooyo giitu, khabhili uweene azimanyile zyonti.

21 Bhaganwa bhaani, inga tutakulongwa mu mooyo giitu, pe tungabha nu wudandamazu uwa kusejeelela pamiiso ga Mulungu.

22 Khabhili tukuposheela kufuma kukwakwe lyolyonti lye tukumulaabha, kunongwa ye tukuz-itinikha indajizyo zyakwe na kubhomba zye zikamukhondezya.

† 3:14 3:14 Bhaazya Yookhani 5:24.

²³ Indajizyo yaakwe ye yi yiini, kuti tulyitikhaje itaawa lya Mwana waakwe uYeesu Kilisiti, na kuganana, anza she atulajiziize.

²⁴ Umuntu we akuzitinikha indajizyo zya Mulungu, akwikhala mu wupeeka nawo, wopepe uMulungu akwikhala mu wupeeka nawo. Tukumanya kuti uMulungu akwikhala mu wupeeka nitwe kwi dala ilya Mupepu uMufinjile we atupiye.

4

Idala ilya kumanya imanyizyo izyi lenga ni zya nalyoli

¹ Bhaganwa bhaani, kunongwa ye abhakuwi abhinji abhi lenga bhafumiiye mu nsi, mutabhitikhaje abhantu bhonti bhe bhakuti bhali nu Mupepu wa Mulungu. Lyoli musimishizyaje akhinza kuti umuntu akulongolwa nu Mupepu wa Mulungu awe khaala.

² Idala ilya kumanya kuti umuntu akulongolwa nu Mupepu wa Mulungu lye li lili: wowonti we akwitikha na kulonga kuti uYeesu Kilisiti, ayinzile akhabha nu mubhili anzu muntu, wanuuyo we akulongolwa nu Mupepu wa Mulungu.

³ Heelo umuntu wowonti we atakumwitikha uYeesu shiniisho, atakulongolwa nu Mupepu wa Mulungu. Umuntu wanuuyo akulongolwa nu mupepu wa mulugu wa Kilisiti. Nimwe, mwimvwizye kuti umupepu wanuuyo akwinza, ishi ayinzile mu nsi.

⁴ Heelo bhaana bhaani, imwe mwe bhantu bha Mũlungu, mubhatolile abhantu bhanaabho abhi lenga, kunongwa ye uMupepu waakwe we ali mukaasi yiinyu. Uweene ali na makha kushila umupepu we akubhalongola abhantu bhe bhatakumwitikha uMũlungu.

⁵ Abhakuwi bhanaabho abhi lenga, bha mũ nsi, bhakulonga izya mũ nsi, bhoope abhantu abha mũ nsi bhatakumutinikha uMũlungu, bhakubhatejeelezya.

⁶ Heelo itwe twe bhantu bha Mũlungu. Umuntu we amumanyile uMũlungu, akututejeelezya, ileelo umuntu we te wa Mũlungu, atakututejeelezya.

Shiniisho she tukumanya uwuleganu wa bhantu bhe bhakulongolwa nu Mupepu uwa wanalyoli, nu wa bhe bhakulongolwa nu mupepu uwi lenga.

Ulugano lwa Mũlungu

⁷ Bhaganwa bhaani, tugananaje, kunongwa ye ulugano lukufuma kwa Mũlungu. Umuntu wowonti we akubhagana abhamwabho, apapiilwe nu Mũlungu, kabhili we amumanyile uMũlungu.

⁸ Heelo umuntu we atakubhagana abhamwabho, atamumanyile uMũlungu, kunongwa ye uMũlungu wa lugano.

⁹ UMũlungu wũyo atulanjile ulugano lwakwe kwi dala ilya kumũsonteelezya uMwana waakwe weeka mwene mũ nsi umu, inga tũwaaje uwumi kushilila kũkwakwe.

¹⁰ Ulu lwe lugano, kuti te twetwe twámuganile uMlungu khaala! Lyoli uweene we átuganile itwe, akhamusonteelezya uMwana waakwe, abhe mpumba iya kubhoolwa inga ayeefwe imbiibhi zyitu na kutukhomaanya nu Mlungu.

¹¹ Bhaganwa bhaani, inga uMlungu átuganile itwe anza shiniishi, yikwanziwa kuti niitwe tugananaje.

¹² Ataliipo umuntu nuumo we amulolile uMlungu naalumo. fleelo inga tukuganana, uMlungu akwikhala mu wupeeka niitwe, nu lugano lwakwe lukukwila kukwitu.

¹³ Tumanyile kuti tukwikhala mu wupeeka nu Mlungu, wope uMlungu akwikhala mu wupeeka niitwe. Tumanyile shiniisho kunongwa ye atupiiye uMupepu waakwe.

¹⁴ Itwe tulolile, khabhili tukubhasimishizya abhanji kuti uTaata uMlungu amusonteleziizye uMwana waakwe mu nsi, kuti abhe Muposhi wa bhantu.

¹⁵ Umuntu wowonti we akwitikha kuti uYeesu Mwana wa Mlungu, uMlungu akwikhala mu wupeeka nawo, wope akwikhala mu wupeeka nu Mlungu.

¹⁶ Ishi, itwe tumanyile na kwitikha kuti uMlungu atuganile.

uMlungu wa lugano. Wowonti we akwikhala mu lugano, we akwikhala mu wupeeka nu Mlungu, uMlungu wope akwikhala mu wupeeka nawo.

¹⁷ Kwi dala liniilyo, uMlungu akukwilizya ulugano lwakwe mukaasi yiitu, inga tubhe nu wudandamazu pi siku ilya kulongwa. Kunongwa

ye uwiikhalo wiitu mu nsi umu, wukukholana na she uYeesu akhikhalaga.

¹⁸ Pe pali na lugano patali ni lyoga, lyoli ulugano ulwa nalyoli lukwefwa ilyoga lyonti, kunongwa ye kulongwa kwe kukubhabhikha abhantu kuti bhogopaje. Umuntu wowonti we ali ni lyoga, ulugano lwa Mlungu lutakwiliye mukaasi yaakwe.

¹⁹ Itwe tukugana kunongwa ye uMlungu we atalile kutugana.

²⁰ Inga umuntu akulonga kuti amuganile uMlungu kumo akumuviitilwa uwamwabho, akwanda malenga. Kunongwa ye umuntu we atamuganile uwamwabho we akumulola na miiso, atangakhola kumugana uMlungu we atakumulola.

²¹ UMlungu atupiiye indajizyo kuti wowonti we amuganile uMlungu, akhondeeye kuti amuganaje na wamwabho.*

5

Kuzitola imbiibhi izya mu nsi

¹ Umuntu wowonti we akwitikha kuti uYeesu wu Kilisiti, wanuuyo we apapiilwe na Mlungu. Umuntu wowonti we akumugana umupaafi, akumugana na mwana wa mupaafi wanuuyo.

² Ishi she tukumanya kuti tubhaganile abhaana bha Mlungu: kwi dala ilya kumugana uMlungu, na kuzitinikha indajizyo zyakwe.

* **4:21 4:21** Bhaazya Bhalaawi 19:18; Maalika 12:30-31.

³ Kumugana uMwungu kwe kuti, tuzitinikhaje indajizyo zyakwe. Khabhili indajizyo zyakwe te mwamu.

⁴ Kunongwa ye wowonti we apapiilwe nu Mwungu, akuzitola izya mu nsi. Shiniishi she tukuzitola izya mu nsi: ku lwitikho lwitu.

⁵ Bhali! Wu naanu we angakhola kuzitola izya mu nsi? Wu wuula we akwitikha kuti uYeesu Mwana wa Mwungu.

Ulusimishizyo ku zya Yeesu Kilisiti

⁶ UYeesu Kilisiti we ayinzile ku minzi,* na kwi bhanda ilya kufwa kwakwe. Atinzile ku minzi meene khaala, lyoli ku minzi na kwi bhanda. Wooke uMupepu uMufinjile akusimishizya kuti ganaago ga nalyoli, kunongwa ye uMupepu uMufinjile we wanalyoli.

⁷ Kuli gatatu ge gakusimishizya izya Yeesu:

⁸ uMupepu, aminzi, ni bhanda ilya kufwa kwakwe, ganaago gatatu gali nu lusimishizyo lwe lukwitinhana.

⁹ Inga tukulwitikha ulusimishizyo lwa bhantu, ulusimishizyo lwa Mwungu lwe lupiti nhaani. Kunongwa ye lunuulwo lwe lusimishizyo lwe uMwungu afumwizye ku zya Mwana waakwe.

¹⁰ Umuntu we akumwitikha uMwana wa Mwungu, ayitishile kuti ulusimishizyo lunuulwo lwa nalyoli. Heelo we atakumwitikha uMwungu, akumabhiikha uMwungu kuti wi lenga, kunongwa ye atalwitishile ulusimishizyo

* **5:6 5:6** *Ku minzi* Pamu yikutekha aminzi aga lwozyo lwa Yeesu awe aminzi aga kupaapwa kwakwe.

lwe uMulungu afumwizye ku zya Mwana waakwe.

¹¹ Ulusimishizyo lunzulwo lwe lu luulu: uMulungu atupiiye uwuumi uwa wiila, uwuumi wanzuzo tukwaga kwa Mwana waakwe.

¹² Umuntu we ali nu wapeeka nu Mwana wa Mulungu, ali nu wuumi wanzuzo. Heelo we atali nu wapeeka nu Mwana wa Mulungu, atali nu wuumi wanzuzo.

Amazwi aga kumalilizya

¹³ Inkubhasimbila amazwi ganaago, imwe mwe mukumwitikha uMwana wa Mulungu, inga mamanye kuti mali nu wuumi uwa wiila.

¹⁴ Ulusimishizyo lwa wudandamazu wiitu pamiiso ga Mulungu lwe lu luulu: tumanyile kuti akutwimvwa inga tukumulaabha lyolyonti nu shigane shaakwe.

¹⁵ Kunongwa ye tumanyile kuti akutwimvwa we tukumulaabha lyolyonti, tumanyile kuti akutupa zye tukumulaabha.

¹⁶ Kuli ni mbiibhi zye zitakumabhiikha umuntu ukutali nu Mulungu wiila na wiila. Inga umuntu akumulola unholo waakwe nu lwitikho akubhomba imbiibhi anza ziniizyo, amupuutile kwa Mulungu, wope uMulungu atimupe uwuumi. Yikubha shiniisho ku bhaala bhe bhakubhomba imbiibhi ziniizyo. Heelo kuli ni mbiibhi zye zikumabhiikha umuntu ukutali nu Mulungu wiila na wiila. Ine intakuti amupuutile kwa Mulungu ku mbiibhi ziniizyo.

¹⁷ Kubhomba lyolyonti lye litakhondeeye pamiiso ga Mulungu, kwe kubhomba imbiibhi.

Heelo peeka na ziniizyo, ziliipo imbiibhi zye zitakumabhiikha umuntu ukutali nū Mūlungu wiila na wiila.

¹⁸ Tumanyile kuti umuntu wowonti we apa-piilwe nū Mūlungu, atakujendeelela kubhomba imbiibhi, kunongwa ye uMwana wa Mūlungu akumelindiilila, umabhomba mbiibhi uSeetani atangamabhomba naalimo.

¹⁹ Tumanyile kuti itwe twe bhaana bha Mūlungu, na kuti abhantu abhanji bhonti bhakutabhaalwa nū mabhomba mbiibhi uSeetani.

²⁰ Khabhili tumanyile kuti uMwana wa Mūlungu ayinzile, atupiiye uwumanyi, inga tumamanye uMūlungu uwa nalyoli. Tuli nū wupeeka nū Mūlungu uwa nalyoli, kwi dala ilya kubha nū wupeeka nū Mwana waakwe uYeesu Kilisiti. Unū we wū Mūlungu uwa nalyoli, khabhili we wuumi uwa wiila.

²¹ Bhaana bhaani, mubhanje amiiso, mutakha-puute ivifwani ivwa bhamūlungu.

**ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 18 Mar 2025 from source
files dated 29 Jan 2022

3aa8e7a3-f258-5182-ab3f-fbc6f725bb06